

3. KABAR YESUS DIMARANAKATN: PUCAYA' KA' DALAPM SIGANA SITUASI

TEKS: Lukas 1:26-38

²⁶ Taka' buntikng Elisabet dah anam bulatn, Tuhan Allah mare' parentah ka' malaekat nang badama Gabriel ampus ka' Nasaret, kota ka' wilayah Galilea. ²⁷ Gabriel di Tuhan Allah ngutus untu' batamu man nangdara gi' bungas badama Maria. Maria koa dah batunangan man nanglaki nang badama Yusup, nang uga' katurunan Raja Daut.

²⁸ Malaekat koa atakng ka' Maria man bakata, “Baati nang repo kita', Tuhan Allah sisi baik ati ka' kita!' Tuhan Allah nyaratai' kita!'”

²⁹ Nangar pakataatn malaekat koa Maria kabingungan man gulisah, sampe ia batanya'-tanya' ka' dalapm atinya, ahe ratinya pakataatn malaekat koa. ³⁰ Malaekat koa bakata agi' ka' Maria, “Ame gali' kita', Maria, jukut Tuhan Allah sisi baik ati ka' kita'. ³¹ Kita' muntingana', man maranakatnna' Kamuda' nanglaki nang arus kita' bare' dama Yesus. ³² Ia jaji'a bakuasa man uga' dinyabut Anak dari Tuhan Allah nang Miah Bakuasa, Tuhan Allah nyajiatnna' Ia Raja lea Raja Daut, ene' uyut-Nya. ³³ Man Ia marentaha' jaji Raja ka' atas katurunan Israel salama-lamanya. Karajaan-Nya ina' baujukng.”

³⁴ Kata Maria ka' malaekat koa, “Lemae bisa jaji lekoa? Aku gi' dara!”

³⁵ Malaekat koa nyahut, “Roh Tuhan Allah ataknga' ka' kita', man kuasa Tuhan Allah nang Miah Bakuasa nyarataia' kita'. Koa tagalnya Kamuda' nang di kita' paranakatnna' koa, disabuta' Kudus, Anak Tuhan Allah.” ³⁶ Dangar boh, kade' Elisabet, kamarkapala kita' koa, ia uga' dah anam bulatn muntingan kamuda' nanglaki biarge' ia dah tuha, nang dah dimadah ugu'.

³⁷ Sabatolnya ahe pun nang di Tuhan Allah mao'i, Ia pane nyajiatnnya.

³⁸ Lalu Maria bakata, “Biarlah jaji ka' aku lea nang di kita' matakatn koa, aku nurut ka' Tuhan Allah.” Lalu malaekat koa ningalatn Maria.

PAMULAATN

Untu' urakng nang idup ratusan tahutn nang de'e, pasti ia ka' koa bapikir ina' mungkin talino bisa tarabakng. Ampeatn, tiap ari, ribuan urakng naik pesawat man tarabakng ka' tempat nang miah jauh. Puluhan tahutn nang de'e, urakng ina' suah bapikir kade' urakng bisa nele' sambil bangomongan man urakng ka' negara lain. Ampeatn man teknologi lea WA, tiap urakng bisa bangomongan man urakng nang badiapm ka' tempat jauh. Tapi samuanya koa ina' dapat dibandingman man kejadian nang ina' masok akal: Tuhan Allah ningalatn saruga, jadi Talino, man badiapm ka' antara diri'. Man untu' manjawat nian, Tuhan Allah milih cara nang sisi miah aneh-nang dara nang gi' bungas baranakka'. Dari pihak Talino: nian' memang ina' mungkin. Lemae tanggapan diri' taka' marasa pakarajaan Tuhan nang ina' masok akal?

NANG DITALITI

- Ahe nang diri' nau'an tentang Maria man Yusup? (ayat 27)
- Lemae malaekat koa nguatatn ati Maria? (ayat 28-31)
- Dalapm ayat 32, Gabriel bakata kade' kamuda' koa “jaji'a bakuasa”, laka' koa ia nyelasatn ampat hal tentang Yesus. Badasaran ampat hal koa, ngahe Yesus di sabut “bakuasa”? (ayat 32-33)
- Lemae tanggapan Maria ka' pakataatn Gabriel? Tele' ayat 29, 34, man 38.

NGAGOI' MA'NANYA

- Ahe bedanya Tanya Maria (1:34) man tanya Sakaria (1:18)? Ngahe laka' batanya' Maria dibarakati tapi Sakaria dinagur?
- Kira-kira, ngahe malaekat koa mare' nau'an ka' Maria bahwa kamarkapala Elisabeth tagah babuntikng?
- Maria dimare' nau'an kade' ia babuntiknga', padahal Maria gi' bungas man tagah batunangan man Yusuf. Man situasi nang lea nian', pamikiran ahe nang di Maria man Yusup adapia'?

PANERAPAN

- Lemae tanggapan diri' ka' panggilan Tuhan Allah dalapm kaidupatn diri'? Lemae tanggapan diri' sama man tanggapan Maria? Ampahe kade' beda?
- Dalapm ayat 37 madahatn “Sabatolnya ahe pun nang di Tuhan Allah mao'i', Ia pane nyajiatnnya”. Ahe ge' Tuhan Allah suah manjawat hal nang dinganggap ina' mungkin dalapm kaidupatn kita'? lea mae ayat nian bisa nguatatn diri' dalapm ahe nang tagah diri' ngadapi'?

BATUKAR PANDAPAT

- Ada banyak urakng nang bakata ina' masok akal Yesus dimaranakatn dari nang dara gi' bungas. Ahe ge' ada sesuatu nang ilang kade' urakng Kristen ina' agi' picaya' kade' Maria masih bungas wa'tu Yesus dimaranakatn?

NANG ARUS DIRI' PANJAWAT

- Taap' kaputusan untu' bakata' “au” ka' ahe nang jaji panggilan Tuhan Allah dalapm kaidupatn diri' ari nian'.

DOA

Badoa supaya Tuhan Allah mare' diri' ati sama lea Maria, nang siap untu' manjawat ahe nang Tuhan Allah mao'i'.